



Broj: 03/1-50-14-7-40-6/17

Sarajevo, 23.10.2017.

PREDMET: Informacija o prisustvu Sifeta Podžića, predsjedavajućeg ZK za odbranu i sigurnost BiH, ceremoniji otvaranja civilne vježbe NATO-a „Bosna i Hercegovina 2017“, Tuzla, 25.9.2017.

Sifet Podžić, predsjedavajući ZK za odbranu i sigurnost BiH, dana 25.9.2017. prisustvovao je ceremoniji otvaranja civilne vježbe NATO-a „Bosna i Hercegovina 2017“, koja je održana u Tuzli.

U organizaciji Ministarstva sigurnosti BiH i NATO-vog Euroatlantskog centra za koordinaciju aktivnosti u pružanju hitnog odgovora (EADRCC), organizirana je civilna vježba NATO-a upravljanja posljedicama elementarnih nepogoda "Bosna i Hercegovina 2017". Vježba je održana od 25. do 29. septembra 2017. u okolini Tuzle.

Na ceremoniji otvaranja vježbe prisutnima su se obratili pomoćnik generalnog sekretara NATO-a Sorin Ducaru i ministar sigurnosti BiH Dragan Mektić.

Tokom ceremonije otvaranja i aktivnosti nakon otvaranja vježbe, zvaničnici NATO-a i BiH su naglasili napore koje Ministarstvo sigurnosti BiH i druge institucije na svim nivoima vlasti u BiH čine za jačanje kapaciteta pravog i specijalističkog odgovora na nastalu nesreću, te da Bosna i Hercegovina tokom ove vježbe ima priliku da pokaže stepen osposobljenosti svojih institucija značajnih za zaštitu i spašavanje, te da se upozna s praksom međunarodnih timova. Tokom aktivnosti koje su provedene u Tuzli 25.9.2017. pokazano je da Bosna i Hercegovina želi pomagati drugima u nevolji, a posebno jačati regionalnu saradnju i regionalni odgovor na eventualne prirodne nesreće koje obično pogađaju više država.

Ovo je 17. EADRCC-ova vježba o upravljanju posljedicama elementarnih nepogoda, a prva koja se održava u Bosni i Hercegovini. Obim ove vježbe je impresivan: više od 1200 učesnika iz 34 zemlje okupilo se u Tuzli koji su spremni da ostvare ciljeve vježbe. Sve ovo pokazuje praktičnu vrijednost partnerskog odnosa, što je naglasio i pomoćnik generalnog sekretara NATO-a Sorin Ducaru.

Tokom razgovora predsjedavajućeg Podžića s učesnicima vježbe naglašeno je da Bosna i Hercegovina kao domaćin vježbe jača regionalnu i međunarodnu saradnju u spašavanju u katastrofama, povećava interoperabilnost između timova, te doprinosi sigurnosti ljudi euroatlantskog područja.

Cilj vježbe upravljanja posljedicama elementarnih nepogoda "Bosna i Hercegovina 2017" je i poboljšanje interoperabilnosti međunarodnih aktivnosti u pružanju odgovora na elementarne nepogode. Realizacija scenarija za ovogodišnju vježbu omogućit će sticanje prakse u međunarodnoj saradnji, te ojačati mogućnosti timova iz različitih zemalja da efikasno rade zajedno što uključuje i aktivnosti spašavanja iz vode, potrage u urbanim područjima, medicinske timove, timove za spašavanje i zaštitu od hemijskog, biološkog, radioaktivnog i nuklearnog oružja, kao i timove za dekontaminaciju.

Predsjedavajući Zajedničke komisije

Sifet Podžić

Dostavljeno:

- naslovu
- a/a